

& de la dedication de la maisonnette ou chappelle que luy auoit fait Cato) vne couronne ou chapeau de triomphe, qui testifie l'honneur & la gloire qui suyuent ordinairement vne victoire. I'ay pensé plusieurs fois que Victoire doit auoir l'accoustrement long, & trainer vne longue queuë apres soy, comme de fait elle se voit en aucunes medalles Romaines & Grecques: pource qu'une victoire obtenue en guerre a vne longue fuite apres soy, c'est à dire, amene beaucoup de mutations & changements. Car lors il aduient que celuy qui ne vous vouloit point de bien, vous est fait ami, & celuy qui ne vous craignoit auparauant, commence à faire compte de vous & vous redouter: & les volontez, singulierement de vos voisins, se changent à l'instant. Et qui voudroit bien peindre & entierement représenter Victoire, il luy faudroit associer & ioindre ses trois sœurs Ialousie ou Enuie, Puissance, & Violence, lesquelles assistent aussi tousiours à Iupiter, & à tous regnans, qui ne sont gueres souuent sans elles. On y pourroit aussi mettre Insolence & Orgueil, vrays compagnes de Victoire. Les anciens ont fait plusieurs simulachres portans en main & eleuans certaines petites Victoires, qui sont appelees des Latins *Victoriola*, desquelles parlent souuent les auteurs, comme Lactance & autres. Je feray fin apres auoir allegué & amené le passage de S. Augustin au 4. liu. de la Cité de Dieu, où il se moque des dieux Gentils, & nommément de ce que les Romains tenoyent Victoire pour deesse, & luy portoient grand honneur: Si, dit-il, Victoire est deesse propice & favorable, & se tourne du costé de ceux qu'elle veut estre victorieux, qu'est-il besoin de Iupiter ne autres dieux, puis qu'elle a toute puissance d'assuiettir toutes prouinces, & faire conqueistes de tous royaumes? Voyla comme il serit de ces Romains idolatres & ainsi amoureux de dieux imaginaires & faits à plaisir.

8.

**L**A huitieme & derniere figure de ceste planche a ceste inscription, *Liberalitas Aug. III.* qui est, *Liberalitas Augusti tertia*, La troisieme largesse de l'Empereur Auguste, à sçauoir, Gordianus: car de luy est la medalle, comme aussi vne autre mienne ayant mesme reuers, & ceste inscription, *Liberalitas Augusti secunda*. En ces reuers est faite mention d'une seconde & troisieme liberalité faite par ledit Gordianus. Ceste largesse s'estendoit au peuple & soldats Romaines. Celle qui estoit faite par le Prince aux soldats, s'appelloit *Donatium*, don ou donation: & celle qui estoit faite au peuple se disoit *Congiarium*, qui est vn terme & vocable formé de ce mot

h.iiij.

Donatium  
Congiarium.